

Miquiasë pënëntërinso'

Samariaquë ya'huëpisopita
Yosëri ana'intacaso
yonquirinso'

1 ¹ Caso Miquiasëco. Morisito nina-
noquë hua'huatërahuë. Inaso'
ninano', Cota huënton israiro'sa no'pa-
nënquë ya'huërin. Siniro hua'narëso
pochin a'notatonco anitotërinco
sopita iso quiricaquë ninshitaranquëma'.
Samaria, Quirosarin, inapita ninano-
ro'sa ma'sona onpotacaso' yonquirinso',
ninshitarahuë. Cotamo copirno Cota
huëntonquë hua'anëntaso', anitotërinco.
Ina piquëran Acasonta hua'anëntaso',
anitotaantarinco. Ina piquëran Isiquia-
sënta hua'anëntaso anitotërinco
sopita, ninshitaranquëma'.

² Ya'ipi piyapinquëma nontaran-
quëmaso natanco'.

Ya'ipi isoro'paquë ya'huërama-
sopita noya natanco':
Siniro chachin chinotërëhuaso
pëinën quëran,
co noyahuë' ninamasopita
nicaton, sha'huirapiarin-
quëma'.

³ Inaso ya'huërin quëran pipira-
huaton,
motopiro'sa aipi huëcapon.

⁴ Huëcaso', motopiro'sa soquiapon.
Pa'nän pëni apoirinso pochin
nitapon.

Pama paquithuaton casha-
rinso pochin
motopianaro'sa nochatapona'.

⁵ Israiro'sa Siniro co yanatëpiso
marëhuë' napoarin.

Inapoatona na'con oshahuanpi
ni'ton, napoarin.

¡Samaria ninanoquë chachin
israiro'sa co natantochináchin-
huë' cancantopi!

¡Quirosarin ninanoquë chachin
Cota huënton israiro'santa',
inahuara nohuanton arta-
roro'sa acopi!

⁶ Napoaton Siniro naporin:
“Ca nohuanton Samaria ninano
ta'huantohuachin,
na'piro'sara' yamorápon.
Inaquë chachin opa shacatona
oparotapona'.

Na'pinënpitanta', motopianaquë
pa'sa pa'satapo.

Ninanonëna pairapicaíso marë'
simintonën acopisonta', aya'-
noarahuë.

⁷ Ya'ipi mamanshinënapita
pa'quiapona'.

Chinotacaiso marë' nararo'santa
acopiso', ahuiquitapona'.

So'yahuan niponahuë', so'in
tëhuananpitërinso pochin
cancantatona',

ina mamanshiro'sa', nararo'sa',
inapita moshacaiso marë'
acopi.

Napoaton ya'ipi inapita ata'-
huantarahuë',” tënin.

Miquiasë sëtatón oshaarinso'

⁸ Siniro napoarin ni'ton, co
napión ancantato na'nërápo.
Sapatë ocoirahuato, i'nanpi-
nantë pa'sápo.

- A'morahuësonta', pa'coirahuato
i'nanpirapi pa'sápo.
Asani' na'nëton, “huaoo,”
tárinso pochin canta', na'në-
rápo.
Huacopi sëtërinso pochin,
nisápo.
- ⁹ Samariaquë ya'huëpisopita
Siniorori ana'intaton,
co noyatochináchinhuë'
acoarin.
Cota huënton israiro'santa',
parisitacaiso canquiarin.
Quirosarin ninanoquë na'con
na'con israiro'sa ya'huëpiri-
nahuë',
inapitanta parisitacaiso
canquiarin ni'ton, napoa-
rahuë.
- ¹⁰ Inaporëhuaso', ama Cato nina-
noquë ya'huëpisopita sha'-
huitocosohuë'.
Ama na'nëcamaso' nohuantoco-
sohuë'.
Co napion ancantatoma',
Piti-ri-apra ninano amocantë-
rinquë, nianapitoco'.
- ¹¹ Sahuiri ninanoquë ya'huërama-
sopitanta',
a'na no'pa'pa' quëpainëmaso
ya'huërin.
I'nanpirashitë' quëpaponëma
ni'ton,
pa'pi taparo nicapoma'.
Saanan ninanoquë ya'huërama-
sopitaso', tancapitaponën-
quëma'.
Napoaton co pipiamaso', nanita-
ramahuë'.
Piti-siri ninanoquë ya'huëpisopi-
tanta', na'nëmiatapona'.
Co huachi inso Cota huënton
Israiro tëranta',
ina ninano quihuiponhuë'.
- Inimiconënapitari ata'huantërin
ni'ton,
co huachi ina quihuiponahuë'.
¹² Quirosarinquë ya'huëpisopita
ahuëcaiso marë'
Sinioro nohuanton inimiconën-
pitari cantiarin.
Napoaton Marotoquë ya'huëpi-
sopitanta',
a'napitari catahuacaiso marë' co
napion cancantapi:
“Catahuainacoiso ninapiraihuë',
co a'na catahuaponacoihuë'
nimara,” taponá'.
- ¹³ Naquisi ninanoquë ya'huërama-
sopita,
canpita a'chinama quëran
israiro'sa nisha cancantopi.
Quirosarinquë ya'huëpisopi-
tanta', anishacancantërama'.
Ina marë' canpitanta', inimico
ta'ananpiamaso marë'
toronano'sa cahuarioro'saquë
a'sontoco'.
- ¹⁴ Morisito-cato ninanoquë ya'huë-
pisopita
co huachi onporo tëranta nian-
tapomahuë'.
Napoaton nontahuatoma
patoco'.
Aquisipi ninanoquë ya'huëpiso-
pitanta',
Israiro copirnoros' a' anishacan-
cantapona'.
- ¹⁵ Ina quëran Sinioro taantarín:
“Marisa ninanoquë ya'huërama-
sopitanta',
ahuëinquëmaso marë' a'nara
minsëtona'pi, a'pataran-
quëma'.
Ina huë'pachin, Israiro copirno,
hua'ano'sa', inapita
Atoramo ninano ya'cari nanin
ya'huërinquë,

na'picaíso marë' ya'conapona'.

¹⁶ Canpitanta Quirosarin nina-
noquë ya'huëramasopita,
co napion ancantatoma', noyá
niya'itoco'.

Hui'namapita nosoromiatë-
ramaso' yonquiatoma',
inapoco'.

Inapitaso' a'na parti inimiconë-
mapitari quëpapona ni'ton,
motëma tamë moto pochin
ya'noamaquë huarë', niuhui-
mototoco',” tënin.

Ma'huano'sa co noyahuë' nipiso'

2 ¹⁻² A'naquëmaso', huë'ëramaquë-
pita co noyahuë' nicaca-
maso yonquirama'.

Chiniquën nanantërama ni'ton,
tahuërihuachina ina inacha-
chin ninama'.

No'pahuë nipon noyahuata-
mara, machinarama'.

Pëihuë nipon noyahuatamara,
ihuatërama'.

Quëmopinënapitarë chachin
piyapi'sa aparisitërama'.

Shimashonënapitari no'pa'
ayanangepiso',

shinpitari hua'anëntapirinahuë',
inapita ihuarama'.

Inaporamasopita, jma'huántacha
canpitaso nisarama paya!

³ Napoaton Sinioro napotërin-
quëma':

“Naporamaso marë' carimanta',
nani yonquirahuë ma'sha
onpota'huanquëmaso'.

Pa'pi chiniquën ma'sha onpoa-
rama ni'ton,
co cha'ësaramahuë'.

Inapotohuatënguëma', co huachi
nocantamaso' yonquiarama-
huë'.

Pa'pi co noyahuë' tahuëri'sa
nisarin ni'ton, napoarama'.

⁴ Ina tahuëri nanihuachin,
sëtatona oshaapiso pochin
tëhuacaiso marë' cantarapiapo-
nënguëma':

‘Noyá ata'huantërinënpochi
paya.

Sinioro piyapinënpitanpoa nipi-
rëhuahuë',

iporaso' a'napita hua'anëntëri-
nënpoa'.

Inapotiinënpooaso marë' co
incari tëranta ya'copirinhüë'.

No'panënpooapitanta', canarinën-
poasopitari nipatomatona',
hua'anëntopi huachi, itapo-
nëma',” tënin Sinioro.

⁵ Sinioroso' catahuainpoaso
marë' iráca canpoarë anoya-
taponahuë',

iporaso' co huachi catahuarin-
pohuë'.

**Nonpi nanan pënëntona'piro'sa
co noyahuë' nipiso'**

⁶ Ma'huano'saso', nonpi nanan
pënëntona'piro'sa tarana-
tona',

pënëntërahuëso' acopitiinacoso
marë' napotërinaco:

“Co manta ma'sha onpoarihua-
huë'.

Napoaton Sinioro anitotërin-
quënso',

co sha'huitápancoiso ya'huërin-
huë'.

⁷ Canpoaso' noya piyapinpoa
ninëhua'. Co Yosë no'huia-
rinpohuë'.

Nosorinpoa ni'ton, co ana'intiin-
poaso ya'huërinhuë'.

Tëhuëchachin naporaiso
pochin Yosëso ninin.

- No'tëquénáchin ina imapatë-
hua',
sha'huitërinpoasopita noya cata-
huarinpoa!', itërinaco.
⁸ Sinioroso nipirinhüè!, inapita
pënënaton:
 "Inapo pënëntatoma canpitaso',
piyapinëhuëpita tapirama'.
 Inapitaso' co natantochináchin-
huè!, cancantatona',
 co huachi yanatërinacohüè'.
 Naporahuatoma piyapinëhuë-
pita ihuarama'.
 Ahuëtopi quëran huënantahua-
chinara:
 'Nani huachi inimiconënpoapita
quëran cha'ërëhua'.
 Noya ya'huëarihua huachi,'
itërama'.
 Napotahuatoma', a'mopisopita
na'con na'con pa'tërinso', osërë-
tërama'.
⁹ Quëyoronosanta pëinënaquë
noya ya'huëpirinahuè!,
 canpitariso' pëinënapita osërë-
tërama'.
 Hua'huinapitanta', noya ya'huë-
caiso mar'è! nani ma'sha
quëtopirahuè!,
 inapitanta matatoma', aparisitë-
rama'.
¹⁰ ¡Co isëquëranchin ya'huëápa-
maso ya'huërinhuè'!
 ¡Paco huachi!
 Co canpita iso no'paquë noya
chinotápamaso ya'huërin-
huè'.
 Canpitari iso no'pa' tapirama
ni'ton, ata'huanta'huaso
ya'huërin.
¹¹ Nonpi nanan sha'huitona':
 'Na'con huino ya'huëapon.
 Nisha nisha o'oi ya'huëhuachin,
 o'otoma no'pirápoma',

topisopita tëhuënchinso', canpi-
taso pa'yatërama!', itërin.

**Piyapinëpita noya
acoantacaso' yonquirinso'**

- ¹² Ina quëran Sinioro taantarín:
 "Piyapinëhuëpita ya'huëpiso
 no'pa quëran, inimiconëna-
pitari quëpaponá'.
 Quëpapirinahuè!, cari chachin
 ya'ipi inapita ayontoanta-
rahuè'.
 Inapitaso' caraya pochin quëpa-
ritopirinahuè!,
 ohuicaros'a huë'ërinquë ayonto-
nëso pochin nitarahuè'.
 Ohuica huënton pastonënuquë
quëparëso pochin nitarahuè'.
 Panca huënton ohuica noncaro-
piso pochin
 israiro'sa noncaropona'.
¹³ Cari chachin quëchitato inapita
quëpararahuè'.
 Inapitaso' natëponaco huachi.
 Pa'pachina', ninano ya'coanata-
quëchin pipipona'.
 Caso hua'anënacó ni'to, Yosënë-
naco," ténin.

**Co noyahuë' hua'ano'sa Yosëri
ana'intacaso sha'huitërinso'**

- 3** ¹ A'na tahuëri Sinioroso' pënë-
taton:
 "Israiro hua'ano'sanquëma'.
 Iporaso' canpita pënënanan-
quëma':
 ¡Canpita'ton mini piyapi'sa
 noya nicatoma pa'poyamaso
 ya'huërin!
²⁻³ Canpitaso napoaponahuè!, co
 noyahuè' nicacaso' pa'yata-
toma',
 noya nicacasoso', co pa'yatëra-
mahuè'.

Nosha pa'ana'piso', ohuica tēpa-
rahuaton i'sorin.
Inapotahuaton noshinēn
nanquitērin.
Nanquitohuachina, nansēquēnā-
chin acorinso pochin
canpitanta piyapinēhuēpita
aparisitērama'.
Ohuica i'sorahuatona
po'mocaiso marē' yaquipiso
pochin
piyapinēhuēpita co tēnororama-
huē'.
⁴ Naporamaso marē' a'na tahuēri
ma'sha onpoatoma nontara-
maco.
Nontopiramacohuē', co a'pania-
ranquēmahuē'.
Pa'pi co noyahuē' ninamaso
marē'
na'pitatē pochin nitaran-
quēma',” itērin.

**Nonpi nanan pēnētopisopita
ana'intacaso sha'huitērinso'**

⁵ Naquēranchin Sinioro taan-
tarin:
“Piyapinēhuēpitaso', chihuēpiso
pochin nisha nisha yonquipi.
Nonpi nanan pēnētopisopitari
nonpintopi ni'ton, napopi.
Inapitaso' insoari tēranta a'ca-
huachina': ‘Quēmaso' noya
ya'huēaran,' itopi.
Ya'huērē' co a'cahuachinara-
huē':
‘Quēmaso napoonin
ya'huēapon,' itopi.
Napoaton cari chachin inapita
itapo:
⁶ ‘Canpitaso tashi nipachina,
hua'narēso pochin
yonquirahuēso anitotēran-
quēma'.

Iporaso nipirinhüē', co huachi
yonquirahuēso' anitotaponquē-
mahuē'.

A'na tahuēri ma'sona onpoca-
sona anitotopiranquēma-
huē',
iporaso' co huachi anitotapon-
quēmahuē',’ itarahuē.

Pi'li ya'compachina co huachi
quēnantērēhuē'.

Inapochachin nonpi nanan
pēnētona'piro'santa',
co huachi manta anitotapohuē'.

⁷ Ninoton quēnana'piro'sa', nino-
tona'piro'sa', inapitaso
co huachi no'tēquēn sha'hui-
ponahuē' ni'ton, piyapi'sari
tēhuapona'.

Napoaton, inapitaso pa'pi
taparo nisapi.

Co huachi anitotapohuē ni'ton,
ta'tápona huachi,” tēnin.

⁸ Caso nipirinhüē', no'tēquēn
Sinioro marē' pēnēntarahuē
ni'to,
achinirinco. Catahuarinco noya
nica'huaso'.

Chiniquēn cancantato, israiro'sa
pēnēntarahuē:

“Canpitaso co Yosē natētomara-
huē', na'con oshahuanama'”
itárahüē.

**Siniorori Quirosarin
ninano ata'huantarinso'**

⁹ Naquēranchin Sinioro pēnēn-
taantarin:

“Israiro hua'ano'sanquēma',
ipora chachin pēnēanta'in-
quēma natanco:

‘Canpitaso noya nicacaso' co
pa'yatēramahuē'.

Napoatoma noya nisapisopi-
tanta', ana'intoconama'.

¹⁰ Chinotërinacoso pëi ya'huë-
rinquë, Quirosarin nina-
noquë,
inaquëpita nitëparápi, niihua-
rápi, naporápi nipirinuë',
canpitaso hua'ano'sanquëma co
manta tënamahuë'.

¹¹ Coisëro'sa pahuërehuachinara,
co huachi tëhuëna'piro'sa
ana'intopihuë'.
Corto hua'ano'santa pahuëreai
huarë', nanamëhuë a'chinpi.
Pënëntona'piro'santa pahuëre-
huachinara:

“Yosë catahuarinpoa canpoaso'.
Ni'sárinpoa ni'ton, co manta
onpoarihuahuë'.

Noya ya'huëáparihua',” itopi.

¹² Naporamaso marë' chinotëra-
macoso pëi
ohuatapona ni'ton, pantatápon.
Quirosarin ninanonta', ina
pochachin nitapi,' tënhuë,”
tënin.

**Siniro ya'ipi
hua'anëntohuachin,
sano cancantapiso'**

4 ¹ Ayaro tahuëri ya'caritohua-
chin,

Siniro chinotërehuaso pëi
ya'huërinquë motopia'hua,
a'napita motopiro'sa quëran
noya noya Siniorori
acoapon.

Naporahuaton a'napita motopi-
ro'sa quëran
ina inápa acoapon.

Ya'ipi isoro'paquë ya'huëpiso-
pita inaquë huëcapona'.

² Notohuaro' nisha nisha piya-
pi'sa huëcapona pochin:
“Huëco pantatëhua Sion moto-
piquë Siniro chinotahua'.

Inaquë pëinën ya'huërin ni'ton,
ya'ipi isairo'sari chinotërin.
Inaso' nanamën a'chintarinpoa'.
Onpopinsona nanpicaso', anito-
tarinpoa',” tosapi.

Ninapotatona', Quirosarinquë
papona'.

Inaquë Siniro nanamën a'chi-
napi ni'ton, pa'sapi.

Inaquë Siniroso' piyapinënpita
nanamën anitotarin.

³ Naporó' Siniroso' coisë pochin
nicaton,
nisha nisha piyapi'sa no'tëquën
sha'huitapon.

Notohuaro' piyapi'sa nanan
ya'huëtopiso', áquë ya'huëpi-
rinahuë',

ma'sona onpotacaiso' sha'hui-
tapon.

Sha'huitohuachin, inahuaso
sahuëninëna quëran
no'pa' ohuërenano'sa ocoia-
pona'.

Nansanëna quëraonta', yaquito-
nano'sa ocoiapona'.

Naporoso', co huachi niahuë-
caiso nia'chintaponahuë'.

Naporahuaton co huachi
niahuëapona'.

⁴ Ina tahuëri nanihuachin, co
huachi të'huarë'na ya'huëa-
ponahuë'.

Opanëna', iquiranëna', inapita
huanirinsoanaquë,
a'naya a'naya noya chinotapona'.
Siniro chachin ya'ipi nanita-
paton, inapocaso sha'huita-
rinpoa'.

⁵ Nisha piyapiro'saso', mamanshi-
nëna natëpi.

Canpoaso napoapona'huë':

“Siniroso Yosënënpoa',” ta'të-
hua', inasáchin natëahua'.

6-7 Sinioro chachin
 sha'huitaantaripoa':
 "Piyapinëhuëpita ana'intërahuë
 ni'ton,
 nisha nisha nacion'saquë
 quëpapi.
 Inaquë na'con aparisitopi.
 Ni'niri ohuicaros'a ya'contaton
 ayanquëtërinso pochin
 piyapinëhuëpita nitërahuë.
 Inapotopirahuë', hua'anënta'-
 huaso caniaritohuato
 cari chachin ana'intërahuë
 quëran, caraya cha'ëpisopita
 ayontoantarahuë.
 Inapitaro'co a'nara panca
 nacion ocoiarahuë.
 Ca chachin Sinioroco, piyapinë-
 huëpita hua'anëntarahuë.
 Sion motopiquë ya'huërahuë
 quëran, hua'anëntarahuë.
 Co huachi onporo tëranta a'na-
 pitari hua'anëntarinhuë'.

8 Quirosarinquë ya'huëpisopi-
 taso', Sion motopiquë noyá
 niacorapipi.
 Inapoaton ohuica a'paina'piro'sa
 torinën pochin ninin.
 Inaquë chachin canta huënsëato
 hua'anëntarahuë ni'ton,
 iráca pochachin niantapon," tënin.

**Co'huara Sinioro
 hua'anëncátërasohuë',
 ma'pitasona onpocaso
 ya'huëarinso'**

9 Ina quëran Sinioro taantapon:
 "Iporaso isairi'osanquëma',
 ya'huërama no'pa quëran
 quëpainëmaso ya'huërin ni'ton,
 jnohuantëramaso chachin
 noncaroco'!
 Sanapi huaica marë' iquitërinso
 pochachin nico'.

Copirno ya'huëtöpirinquëma-
 huë',
 jnimicoro'sa quëpainënuë-
 maso ya'huërin!
 Copirno ayonquina'piro'santa co
 chiminpirinahuë',
 jnimicoro'sa quëpainënuë-
 maso ya'huërin!

10 Co nohuantopiramahuë',
 inimiconëmapita áquë quëpapo-
 nënquëma'.
 Papironia'pa' huarë' cansarama'.
 Papoma pochin caparo'tëquë
 huë'ërantapoma'.
 Napoarama ni'ton, ipora Quirosar-
 inquë ya'huëramasopitaso',
 sanapi yahuaítan nisi'huitërinso
 pochin nico'.
 Napoaponahuë', hua'qui parisi-
 tëramaso piquëran
 inimiconëma quëran carima
 nicha'ësarinquëma'.
 Piyapinëhuëpitanquëma ni'ton,
 napotaranquëma'.

11 Iporaso' na'a nacion'saquë
 ya'huëpisopita
 ahuëinënuëmaso marë' niyon-
 tonpi:
 'Huëco Quirosarin ata'huanta-
 tëhua', capa cancantahua',
 niitopi.

12 Inapitaso', co yonquirahuëso nito-
 topihuë'.

Cari a'na tahuëri inimiconëma-
 pita ayontonarahuë.
 Trico cayarinso mapachinara,
 tonpopi.
 Inapotahuatona to'norapiquë
 yontonpi.
 Inapochachin canta', inimiconë-
 mapita nitarahuë.

13 Ina quëran Quirosarinquë
 ya'huëramasopita camaia-
 ranquëma':

‘Paatoma inimiconëmapita
ana'intoco'.
Toro trico to'norarinso pochin
inapita nitoco'.
Carinquëma catahuanquëma
ni'ton,
ina chinirinso pochin chinia-
rama'.
Hua'na quëran pomohuanaton,
sha'pi hua'na quëran to'tëratëtë-
rinso pochin
nisha nisha parti quëran huë'pi-
sopita ata'huantapoma'.
Inapitaso ihuatatona', tiquita-
tona', inapoatona ma'huan-
piso matapoma'.
Matatoma', quëtapomaco.
Ca Sinioroco ya'ipi isoro'pa'
hua'anëntato,
camaiaranquëma', itaran-
quëma',” ténin.

5 ¹Naquëranchin Sinioro taan-
tarin:
“Iporaso napoaponahuë!, Quiro-
sarinquë ya'huëramasopita,
inimiconëma chinitamaso
yonquico'.
Inapitaso huë'sahuatona', nina-
nonëma tancapitopi.
Inapitari Israiro copirno chiní-
quën ana'intapona',” ténin.

**Tapi shiin hua'anëntacaso
sha'huirinsó'**

²Naquëranchin Sinioro taan-
tarin:
“Pirin ninanoso', Iporata itopi
anta'.
Inaso' ninano', a'napita nina-
noro'sa Cota huëntonquë
ya'huërin quëran
nani nania'huaya.
Ina niponahuë!, ya'ipi israiro'sa
hua'anëntacaso marë'

inaquë a'nara copirno nasi-
tapon.

Ina shimashonënpitaso', iráca
quëran huarë' ya'huëpi,”
ténin.

³Napoaton ipora tananpitopirin-
poahuë!, co hua'qui napota-
rinpoahuë'.
Sanapi cayorin quëran hua'huin
nasitaquë huarë'
parisirinso pochin canpoanta
parisierëhua'.
Naporo' quëparitërehuasopi-
taso',
inimicoro'sari quëparinsopita-
rë'quënpoa a'na huëntoíchin
niantarihua'.
⁴Ina copirno hua'anëntohuachin-
poaso', ohuicaro'sa hua'a-
nëni a'paiaton
noya quëparinso pochin nita-
rinpoa'.
Sinioroso Yosënën ni'ton, inari
chiníquën nanan quëtapon.
Naporahuaton noya noya hua'a-
nëntacaso catahuapon.
Naporo' israiro'sanpoaso', sano
cancantarihua huachi.
Sinioronta ya'ipi isoro'paquë
ya'huëpisopitari
të'huatatona natëpona ni'ton,
napoarihua'.
⁵⁻⁶Ina nohuanton ya'ipi parti sano
ya'huarihua huachi.
Naporo' asiriario'sa huëcapaira-
huatënënpoa',
noyápiachin pëinënpoapitaquë
ya'contaponënpoa'.
Inapotohuachinënpoa
canpoanta', nanirinso
chachin hua'ano'sa',
sontaro'sa', inapita a'patarihua'.
Asiriario'sa ahuëcaiso marë'
napoarihua'.

- Inapitari asiriaro'sa minsëra-huatona nicha'ësarinpoa'.
 Naporo' hua'ano'sa a'parëhuaso-pitasto', inatohua hua'anëntapona'.
- Ina no'pa chachin Nimorotonta', iráca hua'anëntërin.
- ⁷ Naporo' a'napitasto nisha nisha nacionquë quëpapirinahuë', ya'huëhuano'sa ahuëapona'.
 O'nan, poroncayo, inapitasto co piyapi'sa nohuantaiquë huarë' anotërinhuë'.
 Siniorori a'paimahuachina anotërin.
- Inapochachin inapitanta', ya'huëhuano'sa ahuëatona napotapona'.
- ⁸ Naporo' a'napitanta nisha nisha nacionquë yacapata-pirinahuë', pa'pini' pochin nicapona'.
 Ya'ipi ma'sharo'sa quëran pa'piniso', chini chiníquën ninin.
- Inapochachin inapitanta nica-pona'.
- Pa'piniri ohuicaro'sa ya'con-taton, tiquirinso pochin co a'naya tëranta nicha'ëponahuë'.
- ⁹ Ina quëran Sinioro nontato: "Ina pochin mini Sinioro. Quëmari inimiconënpita ahuëaton ata'huantaran," itërahuë.
- ¹⁰ Naquëranchin Sinioro taantarín: "Ina tahuëri nanihuachin, ahuëtamaso marë' cahuario-ro'sa ya'huëtërinquëmaso-pita tiquiapo.
 Quira toronano'santa ya'huëtërinquëmaso', ata'huantarahuë.

- ¹¹ Ninanonëmapita ata'huantarahuë.
 Noyá niacorapipiramahuë', inapotarahuë.
- ¹² Pënotatoma naporamasopitanta', acopitarahuë.
 Ninotona'piro'santa', co huachi ya'huëtërinquëmahuë'.
- ¹³ Mamanshinëmapita ata'huantarahuë.
 Na'piro'santa moshacamaso marë' acoramasopita, inapotarahuë.
 Inapitasto' canpitaora chachin nicapomarahuë', mosharama'.
- ¹⁴ Chinotacamaso marë' nararo'santa acoramaso', hua'tahuatë tël'yatëreso pochin nitarahuë.
 Ninanonëmapitanta', ata'huantarahuë.
- ¹⁵ Naciono'santa' co natërinacosopitahuë', pa'pi no'huitato i'huërëtarahuë," tënin.

**Yosëri israiro'sa
 sha'huirapirinso'**

- 6** ¹ Naquëranchin Sinioroso', nontaantarínpoa':
 "Israiro'sa'. Ca Sinioroco sha'huirapieranquëmaso' natanco':
 A'na piyapi coisëquë quëpahua-chinara,
 huanirahuaton, ma'sona onporinso' coisëro'sa sha'huitërin.
 Inapochachin canpitanta', ma'sona onporamaso' motopiro'sa sha'huitatë pochin nitoco'.
 Inapitanta natanatënnquëma', catahuainënnquëma'," itërinpoa'.

²⁻³ Motopiro'sa' ya'huëre nontaton,
itapon:

“Motopiro'sa', canpitaso simin-
tori pëi achinirinsó pochín
isoro'pa' achinirama'.
Piyapi pochín nicatoma',
piyapínëhuëpita sha'huirapiara-
huëso', natanco'.

Israiro'saso piyapínëhuëpita
nipirinahuë', sha'huirapia-
rahuë,” itërin.

Ina quëran itaantarínpoa':
“Israiro'sanquëma'. ¿Ma'ta
carima onpotatëinquëma
apiranquëma'?

Sha'huitoco nitochi.

⁴ Shimashonëmapita iráca Iquipi-
toquë
chiníquën asacatatona aparisitá-
pirinahuë',
cari ocoiato nicha'ërahuë.
Naporahuaton catahuainëmaso
marë'

Moisésë, Aaron, Maria, inapita
acorahuë.

⁵ Canpitaso piyapínëhuëpitan-
quëma'.

Moapo copirno Paraco itopiso'
naporinsó yonquico'.

Paramo ama huachi noya
ya'huëcamaso marëhuë',
sha'huitiinquëmaso marë' yapa-
huërerinsó', yonquico'.

Inapotopirinhuë', ca nohuanton
Paramori sha'huitërinson'ta',
yonquico'.

Shimashonëmapita Sitin quëran
pipirahuatona',

Quíricaroquë canconacaiso marë'
napopison'ta', yonquirico'.

Cortanii' ayanirahuëtaquëchin
pëntonatona',
pa'pi canatopisopita pochín
nipiso' yonquico',” itërinpoa'.

Siniro nohuantërinso'

⁶ Canpitaso naporama':

“Sinirosó', Yosë. Inápaquë
ya'huërinso'pitanta hua'anën-
tërin.

Ina noya nicainpoaso marë'
¿ma'ta a'notatëhua chinotë-
rë'pëhuaya?

Toroa'huaro'sa a'na pi'ipihuaninsó
oshanënpoa marë' ya'ipi ahui-
quitohuatëhua', ¿noya ni'në-
pënpoa'?

⁷ Huaranca carniro, pa'pi napai'
asitona toma',
inapita a'notohuatëhua', ¿noya
cancantëre'po'?

Siniro co natëtëhuahuë' osha-
huanëhua ni'ton,
pahuëreatë pochín nicacaso
marë',

hui'nanpoa paninantëre'huaso'
quëtohuatëhua
¿noya ni'nëpënpoa'?” tënama'.

⁸ Napopiramahuë', co inapita Siniro-
rosó' nataninquëmahüë'.

Nani inaso ma'sona nicacaso'
sha'huitërinpoa'.

Piyapi'sa nosoroatëhua pa'poyacaso
ya'huërin.

Ma'sona nicacaso' sha'huihua-
tëra, ananicaso ya'huërin.

Naporahuaton: “Caora co nani-
tërahuë noya nica'huaso',”
ta'tëhua',

Siniroíchin natëcaso ya'huërin.

Siniroíchin noya noya nininsó marë' nontërinso'

7 ¹⁸ Sinirosó' noya ni'ton, ina
nontato:

“¿Quëmaíchin Yosëinquën. Co
a'na quëma pochín ya'huë-
rinhuë'!

Piyapi'sa co noyahuë' nimirahuë',
 oshanëna marë' sëtatona nontë-
 rinën ni'ton, nicha'ëran.
 Caraya israiro'sacoi quëparitë-
 raisopita,
 co natantochináchinhuë'
 cancantatoi tēhuëtërainquën.
 Inapopiraihuë' nontërainquën
 ni'ton, tēhuëtërainquënso'
 naniantëran.
 No'huípiro nimiraihuë' nosoro-
 rancoi ni'ton,
 no'huitëranso' asanoran.
 Inapoaton catahuantarancoi.

¹⁹ Iporanta Siniro nosoroantacoi.
 Co noyahuë' ninaiso' inqui-
 tatoncoi pa'pitatë pochin
 nitëquë'.
 Marë anpotërinquë ma'sha
 tē'yaitopiso pochin
 oshanëhuëinta nitëquë'.
²⁰ Shimashonëhuëpita Apraan,
 Cacopo, inapita sha'hui-
 tëran:
 'Shiparimapita nosoromiatato,
 co a'poarahuë', itëran iráca.
 ¡Napotëranso chachin nicatedon,
 nosorocoi!' itërahuë.